

汾州府志

汾州府志卷之二十一

列女上

郝中允戴之妻聶氏戴以孝行著親歿後篤行苦節不仕姻族語其妻使勸之仕曰吾不德無以助君子敢強其所不欲以累其高哉聶事舅姑亦以孝著

石州定胡縣

右宋一人

張崑起妻失姓氏起為國子助教免歸盜陷汾州崑起與妻並赴井死

汾州人

右金一人

姜鳳舉妻皇甫氏夫歿或勸之再適泣曰禽鳥且有不

汾州府志

卷二十一

列女

一

再配者人可反不如乎況舅姑老子幼何忍棄之泰定

中詔旌

汾州西河人

右元一人

郭世玉妻陳氏年二十一夫歿子纔一齡事舅姑撫稚子貞心苦節兩遇兵燹踰九十乃卒洪武中詔旌

劉景博妻矯氏夫歿五十年人未嘗見其貌有一子雲漢紡績以養雲漢後官寧夏訓導宏治中詔旌

舉人常祐妻謝氏夫卒於京家貧舅姑老子纔一齡謝盡孝道知州曹寵陳秉忠相繼牒於巡按額獎之

鎮國中尉朱知燧妻賀氏封恭人見中尉病不起欲先

死以殉遂絕飲食與知熹同日卒時嘉靖二十七年慶成王表樂爲奏聞禮官按典無旌命婦例世宗特命旌之謚曰貞烈

鎮國將軍朱奇漆妻王氏少寡奉姑稱孝年八十餘其子輔國將軍表屹以狀聞嘉靖三十九年賜勅遣行人梅惟和詣第旌獎

韓秀妻謝氏夫歿年十七守志節隆慶初知州齊宗堯額獎之

王蜀妻侯氏年二十一夫歿卽欲從之死家人防守潛吞毒同日卒按院奏請勅旌

汾州府志

卷二十一

列女

二

鎮國將軍朱敏濬妻賈氏年二十五夫歿矢志從死衆慰止之不百日哀毀死巡撫按院俱有匾旌

張大化妻原氏年二十二夫歿事繼姑盡婦禮苦節撫孤巡撫按院俱額表之

田贈妻武氏年十七夫歿紡績撫孤苦節四十餘年巡按額表其門

生員賈庠妻王氏夫歿自刎死學道南居益額獎之生員賀時泰妻賈氏夫歿至貧事姑孝年饑自食糠教子讀書苦節三十餘年卒於明末未舉題曾孫德藩康熙己卯舉人

田伯松妻朱氏伯松歿舅姑亦相繼歿伯松有幼弟甫生數月朱撫之長娶婦尋夫婦皆卒遺子芳朱育爲己嗣教讀書爲庠生巡撫額其門曰一世維風歲給穀二石布一疋

慶成王審臚妃武氏崇正癸未冬李自成渡河掠蒲坂妃聞之不復櫛沐宮媪以問妃曰天之所壞人不能支我待死而已旣而賊至將入府妃赴井死十閱月屍始得出之面如生

李茂材妻劉氏隨夫避賊崖窟賊索得之茂材見殺劉枕夫屍大哭賊擁上馬投地罵賊所脅諸婦羅勸罵益

汾州府志

卷二十一

列女

三

甚賊怒舉刀斫之三以死

朱新堞妻盧氏妾薛氏馮氏新堞晉恭王十七世孫也家汾州崇正十四年知中部縣會賊入關傳檄至新堞方巡城怒而碎之誓必死以守妻妾三人請先自經有女方數歲亦隨母死

李桂妻蘇氏千戶謝德妻王氏田訥妻郭氏劉鎧妻段氏樊鶴妻任氏常保妻田氏俱以節孝詔旌又生員田一蘭妻張氏李金榮妻吳氏蔚大賢妻郭氏並守志節

以上汾陽縣

三孝女趙氏其父老無子三女及笄俱願侍養不嫁父

歿三女躬負土爲墳高三十尺周二畝餘各植柏一株
正德間夜有盜樹者樹將斷斧聲徹村墟聞二十里鄉
人以爲異乃出逐尚存柏一株咸呼爲孝女墳

生員相仲禮妻于氏正統十八年夫歿刺一目以矢志
姑年八十子纔三齡于勤紡織以養姑撫教幼子奏聞
詔旌

生員李華妻矯氏正統九年夫歿舅姑俱八十餘子憲
生纔十月矯事育盡道憲長亦克孝官布政司理問宏
治中詔旌

李辨妻梁氏夫早亡子頤生纔八月梁躬紡織撫之長

汾州府志

卷二十一

列女

四

成化中詔旌頤膺成化乙酉鄉薦官鞏昌府通判人爲
立生祠十所事母稱孝

李得海妻郭氏隆慶元年俺荅兵入境郭被執賊欲污
之郭厲聲曰寧碎身死不辱身而生遂見殺有一女尚
幼隨郭在側能具道訓導程文表其墓

邵良臣妻張氏年二十夫病篤語之曰親老汝肯爲我
事否子幼汝肯鞠否張泣曰分也及歿甘貧孝養有司
額其門曰乾坤正氣子希曾以貢生官夏縣訓導

蘇士學妻李氏年十九夫歿長子繼在抱次子續方娠
李事舅姑撫幼子苦節六十年奏聞詔旌

李蘭妻劉氏年二十二夫歿子在襁褓紡織撫孤苦節
守貞五十餘年巡按額表其門

石廷學妻任氏年十八生一子數月而夫出客死他鄉
任守節撫孤巡按額其門曰柏臺旌節

王廷明妻李氏隆慶元年俺荅入寇抱幼女隨夫避兵
未至城里許賊突至欲掠之去殺女并殺其夫李抱夫
屍痛哭奮罵不屈遂被殺城上人望見之

毛世武妻鞏氏夫出亡里中兒以褻語嘗之氏厲聲大
罵爲所殺守道巡按俱以貞烈表其門

溫登魁妻梁氏年十九夫歿撫幼子甘貧守節姑強之

汾州府志

卷二十一

列女

五

嫁梁以刀墮三指示志卒完節以壽終

雷三畏妻郝氏年十七夫歿生子纔三月既葬夫或勸
之嫁郝指稚子曰我之不死者以有雷氏此子也事姑
撫子三十餘年罕有見其面者萬歷中通判脩憲額其
門曰北宮苦節

任建妻溫氏生員梁土豪妻田氏王胡妻郝氏知縣梁

欖妻曹氏妾閻氏並守志節

以上平遙縣

文整妻李氏年二十三夫歿守志撫孤正統十一年詔
旌

羅維妻宋氏年十八夫歿生子纔三月守志撫孤有司

以聞成化二十三年詔旌

宋彬妻羅氏年二十一夫歿家貧紡績自給嘉靖七年詔旌

李廷保妻秦氏年十八夫歿家貧無立錐之地勤紡織茹糟糠苦節堅貞有諷之嫁者自殘其面毀容貌壽九十餘終萬歷中知縣史記事立碑表之

郭朝臣妻羅氏年二十三生一女夫病篤謂之曰爾年少我死必擇可嫁者羅泣曰吾不忍聞此言有死無二願先死不使夫有不了事及將絕曰不可爲矣遂自縊次日夫死

汾州府志

卷二十一

列女

六

王附學妻梁氏年二十五夫歿孝事舅姑撫孤子壽九十五終嘉靖四十二年詔旌

喬士恩妻郭氏年二十五夫歿撫孤守志孝事舅姑壽七十八有司額表之

宋尙志妻文氏年二十一夫歿守節撫孤天啟中詔旌郭宗妻王氏有姿容一日薄暮宗出惡少潛入其室急大聲呼鄰里惡少逸去宗還白其事且曰我雖未受辱豈忍受強暴抱持遂自縊巡按移檄撰碣表墓

王天福妻梁氏天福病噎梁焚香祝願與同死及夫歿越數日食杏仁死

王睿妻鈕氏鴻臚寺寺丞王嘉璋妻趙氏俱以節操稱
趙年二十方娠而嘉璋歿守志撫孤子長爲諸生有司
表其門曰節存宗祀

庠生張翼儒之子婦閻氏甲申之變恐被辱自縊死

文雲鳳之母及妻並失姓氏雲鳳以材武選充近侍母
與妻俱在京師甲申之變雲鳳以爲臣死忠與母訣母
曰吾從子食祿天朝寧自生願先死以成子志遂自刎

雲鳳及妻女皆焚死

以上介休縣

任全繼室張氏年二十夫歿有前妻一子文約纔三齡
張守志撫孤其後孫女二一適劉公順一適李頤皆夫

汾州府志

卷二十一

列女

七

早歿勵志節終其身

吳全妻張氏年二十夫歿苦節守貞舂汲緝紡以養姑
戚屬有以貧諷之者卽面斥不與更見及姑卒甘處困
窮以終

監生田賦妻霍氏賦有孝行以母憂病卒霍慟曰吾夫
死而吾獨存耶縊喪次家人救免賦旣葬乘間卒自經
賦弟貢之妻吳氏夫早歿撫孤永錫及長娶婦郭氏永
錫有孝行又早歿郭亦矢志守貞趙訥記其碑陰曰吳
郭之節永錫之孝皆不可無聞於世

張烈婦楊大仁之妻也大仁多從匪類遊有曹姓者嘗

至其家見張有色一日探知張歸寧要於廣仁寺後之壞垣始以夫在內欲有語未入垣卽牽衣欲逼之張力拒喊罵被殺

生員任希閔妻趙氏年十九夫歿子朝生纔月餘守志撫孤事舅姑甚謹朝宗後官睢州通判嘉靖中詔旌生員張荷妻王氏年二十夫歿苦節守貞事舅姑孝學道表其門曰貞節第

鄆縣知縣馬廷華妻王氏廷華卒於官子又殤王爲夫樹坊表易產業不足出糴奩佐之曰夫旣無後庶藉此以傳於世萬歷中知縣胡來覲表其門

汾州府志

卷二十一

列女

八

辛門妻傅氏教諭傅相之孫女也俺荅兵入寇夫爲賊所殺傅聞投崖死

生員史宗王妻孫氏俺荅兵入寇時孫年二十方娠而夫爲賊所殺矢志守貞冀有子以承夫後及生果男也撫教之萬歷乙酉舉於鄉知渭南縣有司奏請詔旌任克己妻孫氏俺荅兵入境掠其家孫扶姑伏草中兵先殺姑脅從之孫罵不絕聲復以刀斫其髮不屈賊知不可奪刃其腹面死
任自修妻程氏流賊至境肆掠入其室欲污之程罵不絕聲觸壁而死

武烈女生員武有昇之女也字柏氏子未嫁而壻夭女誓不再字父母憐之仍爲議婚納徵者至女聞入密室自經死事聞詔旌

舉人孫章妻李氏呂鉞妻韓氏拔貢張正志妻任氏並

守志節

以上孝義縣

生員冀善妻嚴氏年二十夫歿子纔二齡父母憫之令再適嚴曰吾爲士人妻豈效醜婦行以自玷邪事舅姑撫幼子閨門肅然壽八十五終宏治中知縣盧安上其事詔旌

韋太妻李氏夫早歿矢志撫孤子長官州判宏治二年

汾州府志

卷二十一

列女

九

詔旌

喬廷瑞妻高氏年二十四夫歿自縊死

武勉仁妻高氏年二十一夫歿子績纔一齡苦節撫孤績長爲諸生嘉靖中知縣楊尙義請於巡按立坊表之王廷佑妻郝氏年二十三夫歿養姑撫子白首不櫛沐巡按檄縣立坊表之

袁汝器妻穆氏夫歿無子矢志守貞舅天保潛受郝養志財聘穆知之自縊死知縣常時芳申請給祭葬額表之

趙從東妻劉氏夫歿無子戚屬諷之嫁曰禽獸之不若

不可爲也。繼子環未幾蕩產殆盡。劉乃刺黻自給。壽八十六終。

王大賢妻薛氏。夫歿。子三聘。纔二齡。撫之長。爲諸生娶郭氏。而三聘又早歿。子守中。纔四齡。家本甚貧。皆苦節守貞。

賀承惠妻陳氏。年二十五。夫歿。子誥。纔四齡。績紡撫孤。誥爲諸生。萬歷中。詔旌。

知州郭有爲妻任氏。子孔亨。妻白氏。孫肯。構妻高氏。三世孀居。節操如一。有司表其門。

高胤舜妻郭氏。年二十四。夫歿。姑亦以痛子。繼歿。郭拮

汾州府志

卷二十一

列女

十

据兩喪子。嶠。纔六歲。岵。三歲。有叔姑。欲奪其志。郭剪髮矢志。刺黻撫孤。二子長。皆爲諸生。萬歷中。知縣常時芳上其事。詔旌。

郝有成妻崔氏。年二十四。夫歿。子騰。纔四齡。孝事舅姑。撫幼子。騰。長。爲諸生。萬歷中。知縣劉汝哲上其事。詔旌。生員殷福妻郭氏。夫歿。撫子永泰。長。爲諸生。未幾。永泰又卒。而舅姑尙異殯。郭拮据合葬焉。萬歷中。知縣楊如魯額表之。

劉愼體妻韓氏。年二十三。夫歿。撫二子。光祚。建鼎。及長。俱爲諸生。天啟中。知縣李度請旌。未報。

賀寧邦妻賈氏年未二十聞流寇攻城入恐見辱抱幼女投井死

郭增妻高氏聞城破賊已入倉皇自經死

高烈女高汝賢之女也年未笄賊掠之馬上女投地罵賊扶上復墮者數四遂見殺知縣登城守目覩其狀表以額曰正氣干霄

樊節妻劉氏崇正五年賊陷城爲所掠罵賊死知縣申請額表之曰女丈夫

歲貢郝孔照妻陳氏聞賊陷城登城自墜死旌曰貞烈

以上臨縣

汾州府志

卷二十一

列女

十一

生員李元浹妻賀氏元浹罵賊死賀矢志撫孤二子及長皆爲諸生

任自立妻許氏崇正五年賊破城入同子起家妻趙氏俱墜城死有司表之曰一門雙烈趙有子二長積慶次長慶後長慶官淮安府知府有惠政

生員王珙妻鄭氏歸珙未踰年珙歿矢志守貞事姑九載曲盡孝道姑卒有欲奪其志者鄭歎曰吾之不死以有姑也今姑死何以生爲遂自縊

張法聖妻李氏義士李士浹之女也年十八夫歿守節二十餘年會李自成之亂投井死

賀應元妻劉氏年二十夫歿子生纔數月苦節撫孤有司奏請詔旌

庠生鄭維賢妻孫氏年二十五夫歿甚貧苦節守貞壽

七十二終旌表祠祀

以上石樓縣

梁烈婦梁仲女也適生員阮福福交趾人父寧爲青龍驛驛丞福死梁年二十亦自經成化中有司奏聞詔旌張璞妻李氏年二十三夫歿事舅姑以孝稱矢志撫孤四十餘年嘉靖中知州王達以其事聞詔旌

生員閻文淳妻王氏年十九夫歿無子而甚貧矢志守貞壽八十一終嘉靖中知州張錡常餼米肉奏聞詔旌

汾州府志

卷二十一

列女

十二

安勲妻白氏嘉靖辛丑寇亂白從夫匿土穴寇攻急令夫逸去罵賊不屈身被十餘創死明年奏聞詔旌

牛宗近妻李氏俺荅兵入寇夫婦俱被執李以身蔽夫曰寧殺我毋殺夫賊並殺之明年詔旌

侯景儒妻吳氏賊至走避山洞中賊烽四起知不免乃棄兒投水賊急挽之載馬上吳刺面怒罵遂被殺

典膳張環妻李氏張蘭妻馮氏俱孀居守志罵賊被殺又喬甫妻郭氏亦以罵賊死明年並詔旌

賀烈女年十七未適人嘉靖辛丑從父匿山谷爲賊所獲強之行不從賊支解之明年詔旌

溫烈女年十六嘉靖辛丑被掠女仆地不起罵不絕口賊怒斷其頭以去明年詔旌

生員張鏃妻崔氏夫早歿無子守節五十餘年奏聞詔旌

生員車煜妻張氏年十九夫歿無子卽自縊奏聞詔旌
張珊妻王氏年二十夫歿事舅姑盡孝道壽逾七十終
奏聞詔旌

按察司副使胡汝輔之側室鄭氏少貞靜言笑不苟汝
輔疾革先自縊有司表其門

生員車坦妻胡氏年二十五夫歿甚貧苦節五十餘年

汾州府志

卷二十一

列女

十三

事聞詔旌

山東副使喬應光妻蘇氏生員車同軌妻喬氏隆慶元
年城陷俱赴井死都御史並請旌表是年石州之變自
縊投井者廟宇井坎所在皆滿權州事李春芳爲收男
女名瘞一大塚得旌者惟蘇喬數人其湮沒不傳者不
知凡幾而石州巡檢劉祐任邱縣人秩滿同子治起文
在省適石州陷其妻董氏與女挽髮環抱投井死治婦
爲幼子所牽遂被掠祐聞變趨歸莫得家人所在會治
婦乘間逃還語其狀始縊井出之母女抱如故當事義
之爲治殮給驛歸葬

張鉞妻王氏年十九夫歿無子矢志守貞四十餘年有司額表其門

崔某妻王氏王惟春之女也其夫弟欲污之王罵退遂自縊後夢其父寃得白巡按立烈婦碑以表之其文曰質清冰玉節勁松筠明嫌惡辱死不愧心蚩蚩夫弟那知人倫一日投縵千古名馨

崔烈婦崔有福妻也甲申之亂爲賊將田虎所執罵賊以死其子同時被殺

張瑛妻梁氏年十九夫歿子方在襁褓矢志撫孤壽踰七十終有司請旌表

汾州府志

卷二十一

列女

十四

王廷弼妻張氏年二十五廷弼遭李自成之亂死於賊有子纔七齡矢志撫孤苦節五十餘年

以上永寧州

生員李坤妻劉氏適坤半載坤死遂自縊

高聰妻杜氏正德末賊掠至境欲逼犯之杜罵不絕口被殺

劉瑋妻曹氏年十九夫歿甚貧苦節守貞以終萬歷初知縣公一揚額表其門

王崇德妻田氏年二十夫歿遺孤朝相纔一齡撫之長娶高氏未幾朝相又歿姑婦共績紡守節有司額表其門資米二石布四疋

生員劉有孚妻楊氏年二十夫歿無子而甚貧苦節守
貞隆慶二年知縣李卿額表之

生員衛君寵妻劉氏少寡守貞教子直指旌其門

劉進良妻任氏夫歿子纔二齡甚貧苦節五十八年萬
歷七年病卒壽八十有六有司表其門

武進珮妻白氏夫歿子纔二齡操作勵節知縣吳三聘
上其事額表之

生員楊燦妻王氏年二十五夫歿守節撫孤萬歷二十
六年三院表獎之

生員王榦妻靳氏榦疾篤靳割股冀愈之及卒姑武氏

汾州府志

卷二十一

列女

十五

患瘡靳口吮之守節盡孝巡按額表其門

生員王正妻楊氏年二十七流賊破城殺正掠之扶馬
上楊從馬投地罵賊以刃挾之楊曰吾王尚書孫婦死
不受辱賊斷其身爲二以死時同難見者婦人三四亂
定後三四人尚存鄉人詢之歷歷能道其詳言楊身傷
七刃有司額表之

以上寧鄉縣

右明百四十餘人

